

JAMINAN PM PADA BERJASA

Kerusi di beberapa negeri ditimbang

Oleh NORDIN MOHAMAD

KOTA BAHRU, Isnin — Perdana Menteri, Datuk Seri Dr. Mahathir Mohamad, memberi jaminan akan menimbang memperuntukkan beberapa kerusi Parlimen dan Dewan Undangan Negeri kepada Parti Berjasa di Kelantan, Trengganu, Kedah dan Perak dalam pilihanraya umum akan datang.

Jaminan ini dibuat oleh pengerusi Barisan Nasional dalam perjumpaan khas dengan Jawatankuasa Agung Berjasa diketuai oleh Presidennya, Datuk Haji Mohamad Nasir, di Kuala Lumpur Jumaat lalu.

Dalam perjumpaan dengan pucuk pimpinan Berjasa bulan lalu, Datuk Seri Dr. Mahathir bersetuju sebelas kerusi Dewan Undangan Negeri diwakili Berjasa di Kelantan sekarang kekal kepada parti tersebut.

Setiasusaha agung Berjasa, Enck Ismail Haji Ali, memberitahu Berita Harian hari ini dalam perjumpaan Jumaat lalu Perdana Menteri memberi jaminan untuk menimbang pemberian beberapa kerusi Parlimen dan Dewan Undangan Negeri di Kelantan, Trengganu, Kedah dan Perak.

Menurut beliau, Datuk Seri Dr. Mahathir akan membincang terlebih dahulu perkara tersebut dengan rakan-rakan lain dalam Barisan Nasional, khususnya UMNO sendiri.

Enck Ismail berkata, pada 10 Mac lalu, Berjasa menyampaikan satu memorandum khas kepada Perdana Menteri mengenai perkara peruntukan kerusi Parlimen dan Dewan Undangan Negeri kepada parti itu dalam pilihanraya ini.

Kemampuan

Dalam memorandum itu, tambahnya, Berjasa menerangkan secara terperinci mengenai permohonan parti itu untuk mendapatkan peruntukan kerusi Parlimen dan Negeri.

Enck Ismail menjelaskan, Berjasa akan menerima kerusi-kerusi yang diperuntukkan kepadanya sama ada peringkat Parlimen atau Negeri berasaskan kepada kekuatan dan kemampuan parti tersebut di kawasan-kawasan berkenaan.

Dalam konteks ini, katanya lagi, Berjasa menimbang dari segi kelayakan kekuatan dan kemampuan dalam mencapai kemenangan bagi kerusi-kerusi yang dimintanya.

Dalam perjumpaan itu, kata Enck Ismail, pucuk pimpinan Berjasa meminta agar kerusi-kerusi yang diperuntukkan kepada PAS semasa parti itu dalam Barisan Nasional dahulu, diberikan pula kepada Berjasa.

"Kita berharap jumlah kerusi Parlimen dan Dewan Negeri yang akan dibentangkan kepada Berjasa nanti satu jumlah yang memuaskan, cukup untuk meyakinkan para penyokong Berjasa sebagai sebuah parti yang baru," ujarnya.

Bahan asal dari Arkib
Negara Malaysia

2446
ma... 190/85